


周易集解纂疏

一





周易集解纂疏

(一)

李道平著

# 周易集解纂疏自序

古人之說易也慎。後人之說易也僭。古人之說易也。言象數而義理在其中。後人之說易也。言義理而象數因之以隱。說卦曰。聖人設卦觀象。又曰。聖人立象以盡言。又曰。極數知來之謂占。又曰。極其數遂定天下之象。使象數可廢。則聖人之言爲無稽。而義文之假象數以垂訓者。反等於駢拇附贅。夫規所以爲圓。矩所以爲方。必規矩具然後方圓成。斷無方圓成而規矩遂爲可棄。故作易者不能離象數以設爻象。說易者即不能外象數而空談乎性命矣。說易莫先于左氏。內傳紀事。雖不免或失之誣。然解釋筮辭。皆準象數。猶可考見古人說經之遺。漢儒踵周秦而興。易師授受。一脈相承。恪守典型。毋敢失墜。凡互卦卦變。以及卦氣、爻辰、消息、納甲、飛伏、升降之說。皆所不廢。蓋去聖未遠。古義猶存。故其說往往與義文之旨相契合。自時厥後。一變爲晉易。而老莊虛無之燄熾。再變爲宋易。而陳李圖學之說興。夫老莊之虛無。陳李

之圖學。斷不能遠出漢儒象數之上。且王氏之注。論象數既不及漢儒之確。論義理又不及宋儒之醇。進退無所據。有識之士。多擯斥不肯道。迺唐祭酒孔君冲遠。奉勅疏解諸經傳注。獨于易黜鄭虞而宗王韓。取輔嗣野文。疏而行之。其書遂藉以獨尊于世。而漢學寢微。于是梓州李君鼎祚。恐逸象就湮。乘其時古訓未散。取子夏以下三十餘家。成集解一書。表章漢學。俾古人象數之說。得以緜延至今。弗絕。則此編之力居多。予少時嘗取其書讀之。隱辭奧義。深邃難闡。予不自揆。輒欲有所闡發。以通窅宣幽。卒以多所滯礙而止。久之得東吳惠氏書。而向之滯者。十釋四五矣。又久之。得毗陵張氏書。而向之滯者。十釋二三矣。又久之。廣覽載籍。旁及諸家之說。而向之滯者。卽有未釋。蓋亦無幾矣。復不自揣。萃會衆說。句梳而字櫛之。義必徵諸古。例必溯其源。務使疏通證明。關節開解。讀者可一覽而得其指趣。舊注閒有未應經義者。或別引一說以申其義。或旁參愚慮以備一解。亦不敢墨守疏家孤正首邱葉歸根本之習。是編也。其有

當于絜靜精微之教與否則不敢知。其于漢魏諸儒之學。則未嘗無一日之功焉。抑又思之。自唐迄今千餘載。無人起而爲之疏。而予獨毅然爲之而不辭。予方懼其弗慎且近僭。而又安敢自以爲功也。書旣成。謹述其原委。弁諸卷端。亦聊以備講漢學者採擇焉爾。道光二十有二年歲次壬寅冬十月。安陸李道平遠山氏書于有獲齋。

# 周易集解序

敍曰元氣網緼三才成象〔疏〕

謂在天成象也。

神功泱洽八索成形〔疏〕

謂在地成形也。

在天則日月運行潤之以風雨在

地則山澤通氣鼓之以雷霆〔疏〕

漢書五行志雷于天地爲長子二月出地八月入地故此以雷霆屬之地也。

至若近取諸身四支百體合其度〔疏〕

若乾爲首之類是也。

遠取諸物森羅萬象備其工〔疏〕

如說卦所載是也。

陰陽不測之謂神一陰一陽之謂道範圍天地而不

過曲成萬物而不遺仁者見之以爲仁知者見之以爲知百姓日用而不知君子之道鮮矣斯乃顯諸仁

而藏諸用神无方而易无體〔疏〕

皆繫上文。

巍巍蕩蕩難可名焉〔疏〕

以上言未有八卦之前故云巍巍蕩蕩難名也。

逮乎天尊地卑君臣位

列〔疏〕

謂乾坤也。

五運相繼父子道彰〔疏〕

謂六子也。

震巽索而男女分咸恆設而夫婦睦人倫之義旣闡家國之

教鬱興〔疏〕

此卽序卦所云有男女然後有夫婦有夫婦然後有父子有父子然後有君臣有君臣然後有上下有上下然後禮義有所錯是也。

故繫辭云古者庖犧氏王天下也始畫八

卦以通神明之德以類萬物之情作結繩而爲罔罟以佃以漁蓋取諸離庖犧氏沒神農氏作斲木爲耜

揉木爲耒。耒耨之利。以教天下。蓋取諸益。日中爲市。致天下之人。聚天下之貨。交易而退。蓋取諸噬嗑。神農氏沒。黃帝堯舜氏作。通其變。使人不倦。神其化。使人宜之。剡木爲舟。剡木爲楫。舟楫之利。以濟不通。蓋取諸渙。服牛乘馬。引重致遠。蓋取諸隨。古者穴居而野處。後代聖人易之以宮室。蓋取諸大壯。弦木爲弧。剡木爲矢。弧矢之利。以威天下。蓋取諸睽。上古結繩爲政。後代易之書契。百官以理。萬人以察。蓋取諸夬。故聖人見天下之噴而擬諸形容。象其物宜。而觀其會通。以行其典禮。觸類而長之。六十四卦三百八十

四爻。天下之能事畢矣。其旨遠。其辭文。其言曲而中。其事肆而隱。若夫雜物撰德。辨是與非。〔疏〕

皆上下繫文。

終日乾乾。夕惕若厲。〔疏〕

本乾九三。

無有師保。如臨父母。〔疏〕

繫下文。

自天祐之。吉无不利者也。〔疏〕

大有上九爻辭。

至

於損以遠害。〔疏〕

繫下文。

說以先之。〔疏〕

謂說以先民。

定其交而後求。安其身而後動。履和而至。謙尊而光。能說諸

心。能研諸慮。是故君子居則觀其象而玩其辭。動則觀其變而玩其占。著之德圓而神。卦之德方以智。探

噴索隱。鈞深致遠。定天下之吉凶。成天下之亹亹。莫善乎蓍龜。神以知來。智以藏往。將有爲也。問之以言。

其受命也。應之如響。無有遠邇幽深。遂知來物。故能窮理盡性。利用安身。聖人以此洗心。退藏於密。〔疏〕

上下  
繫文。

自然虛室生白。吉祥至止。〔疏〕

莊子人間世。虛室生白。吉祥至止。

坐忘遺照。〔疏〕

莊子大宗師。顏回曰。回坐忘矣。仲尼蹙然曰。何謂坐忘。顏回曰。墮肢體。黜聰明。離形去智。同于

大通。此謂坐忘。按坐忘遺照。見韓康伯陰陽不測之謂神注。孔疏謂事出莊子大宗師篇。然莊子述顏回坐忘。實無遺照字也。

精義入神。〔疏〕

繫下

口辟焉不能言。心困焉不能知。微

妙玄迪。深不可識。〔疏〕

以上皆言易之微妙。

易有聖人之道四焉。〔疏〕

繫上

斯之謂矣。〔疏〕

謂以言者尙其辭。以動者尙其變。以制器者尙其象。以下筮者尙其

占。原夫權輿三教。〔疏〕

陶宏景茅山長沙誼碑。百法紛湊。無越三教之境。三教謂儒釋道。

鈐鍵九流。〔疏〕

范甯穀梁序。九流分而微言隱。漢書藝文志。儒家流出于司徒。道家流出于史官。陰陽家流出于羲和。法

家流出于理官。墨家流出于清廟官。縱橫家流出于行人官。雜家流出于議官。農家流出于農稷之官。小說家流出于稗官。

實開國承家脩身之正術也。〔疏〕

謂易足以始三教而管九流。故爲開國承家脩身之正術。

也。自卜商入室。親授微言。〔疏〕

家語。孔子讀易至于損益。喟然而歎。子夏避席而問曰。夫子何歎。子曰。夫自損者必有益之。自益者必有缺之。吾是歎也。子夏曰。然則學者不可以益乎。子曰。非道益之謂也。道彌益而身彌

損。夫學者損其自多。以虛受人。故能成其滿。博哉天道。大而必變。凡持滿而能久者。未嘗有也。子夏曰。商請志之。而終身奉之。按隋書經籍志。有子夏易傳二卷。唐志同。中經簿四卷。阮氏七錄六卷。陸氏釋文序錄三卷。國史志。中興書目。皆作十卷。然其實後人僞託。非出



子夏傳注百家。繇歷千古。雖說有穿鑿。猶未測淵深。〔疏〕  
謂漢魏以來說易之家其詳具于漢書藝文志。隋書經籍志。 唯王鄭相沿。頗行于

代。〔疏〕  
隋志。鄭玄周易注九卷。王弼周易注六卷。 鄭則多參天象。王乃全釋人事。〔疏〕  
鄭氏多尚象數。王氏專言名理。 且易之為道。豈偏滯於天人者

哉。致使後學之徒。紛然淆亂。各脩局見。莫辨源流。天象遠而難尋。人事近而易習。〔疏〕  
王應麟鄭氏周易注序。康成注易九卷。多論互

體。以互體求易。左氏以來有之。王弼尚名理。譏互體。江左鄭學與王學並立。荀崧謂康成書根源。顏延之為祭酒。黜鄭置王。齊陸澄詒王

儉書云。易自商瞿之後。雖有異家之學。同以象數為宗。數年後乃有王弼之說。王濟云。弼所誤者多。何必能頓廢先儒。今若宏儒。鄭注不

可廢。河北諸儒。專主鄭氏。隋興。學者慕弼之學。遂為中原之師。又王儉曰。易體微遠。實貫羣籍。施孟異聞。周韓殊旨。豈可專據小王。便為該備。依舊存鄭。意謂可安。則折楊黃華。嗒然而笑。〔疏〕  
莊子天地篇。大聲不入于里耳。折柳

皇華則嗒然而笑。皇華亦作黃華。方以類聚。〔疏〕  
繫上。其在茲乎。〔疏〕 隋書。鄭康成王弼二注。梁陳列于國學。齊代惟傳鄭義。至隋。王注盛行。鄭學浸微。今殆絕矣。以上言鄭廢王興。以起下文作集解之意也。

臣少慕玄風。遊心墳籍。歷觀炎漢。迄今巨唐。采羣賢之遺言。議三聖之幽蹟。集虞翻。荀爽。三十餘家。〔疏〕

凡三十五家。一子夏。已見。一孟喜。漢書孟喜字長卿。東海蘭陵人。藝文志有孟喜周易章句二篇。又周易災異十一篇。一焦延壽。漢書延壽字贛。梁人。隋書經籍志有焦氏易林十六卷。易林變占十六卷。易林存變占佚。今隨卦所采一條。不見易林。當屬變占中語也。一京房。

漢書京房字君明。東郡頓邱人。漢志有京房易傳十一篇。七錄有章句十卷。隋志又有錯卦妖占。占事守林。飛候。及飛候六日七分。四時

候。混沌。委化。逆刺。占災異。馬氏通考又有易傳積算法雜占條例等書。今所采者。大抵皆章句中語也。一馬融。後漢書馬融字季長。扶風

茂陵人。注孝經論語詩易三禮尚書。七錄有馬融周易注一卷。釋文序錄新舊唐書作章句十卷。一鄭玄。後漢書。鄭玄。字康成。北海高密人。注周易。七錄有鄭玄周易注十二卷。舊唐書同。隋志作九卷。釋文序錄新舊唐書作十卷。一荀爽。後漢書。爽字慈明。一名譚。潁川潁陰人。著禮易傳詩傳尚書正經春秋條例。隋志有荀爽周易注十卷。新舊唐書作十卷。一九家易。隋志有九家易解。陸德明曰。荀爽九家集注十卷。不知何人集。所稱荀爽者。以爲主故也。其序有荀爽。京房。馬融。鄭玄。宋衷。虞翻。陸績。姚信。翟子元。注內又有張氏朱子。並不詳何人。一劉表。後漢書。劉表字景升。山陽高平人。魯恭王之後也。隋志有劉表周易章句五卷。新舊唐書同。中經簿錄作易注十卷。七錄作九卷。目錄一卷。一宋衷。陸德明曰。衷字仲子。南陽章陵人。隋志。梁有漢荊州五業從事宋衷注周易十卷亡。七錄新舊唐書同。釋文序錄作九卷。一王肅。魏志。肅字子雍。陸德明曰。東海蘭陵人。隋志有王肅周易注十卷。崇文總目作十一卷。一王弼。陸德明曰。弼字輔嗣。山陽高平人。注易上下經六卷。作易略例一卷。隋志亦作六卷。七錄作十卷。一何晏。册府元龜。何晏撰周易私記二十卷。周易講說十三卷。一虞翻。吳志。虞翻字仲翔。會稽餘姚人。隋志有虞翻周易注九卷。易律曆一卷。周易集林一卷。七錄有周易日月變例六卷。一陸績。吳志。績字公紀。吳郡吳人。注周易。隋志有陸績周易注十五卷。注京氏易一卷。一姚信。阮孝緒曰。姚信字元直。吳興人。陸德明曰。信字德祐。隋志有姚信周易注十卷。一翟玄。九家易作翟子玄。陸德明曰。子玄不詳何人。爲易義。一韓康伯。晉書。韓伯字康伯。潁川長社人。隋志有康伯繫辭注三卷。一向秀。晉書。向秀字子期。河內懷人。釋文序錄云。秀爲易義。一王廙。晉書。王廙字世將。丞相導從弟。隋志有王廙周易注三卷。七錄作十卷。釋文序錄作十二卷。作三卷者。蓋殘闕本也。一張璠。陸德明曰。璠。安定人。東晉祕書郎參著。作集解十二卷。七錄有張璠周易集解十卷。隋志八卷。殘闕新舊唐書仍云十卷。又略論一卷。一干寶。晉書。干寶字令升。新蔡人。注周易。隋志有干寶周易注十卷。周易又義一卷。周易問難二卷。周易玄品二卷。七錄有周易宗塗四卷。一蜀才。顏之推曰。姓范氏。名長生。自稱蜀才。隋志。蜀才周易注十卷。一劉暉。南史。劉暉字子珪。沛郡人。隋志有劉暉周易乾坤義一卷。七錄有周易四德例一卷。又有周易繫辭義疏。一沈驥士。南齊書。驥士字靈禎。吳興武康人。著周易兩繫。又云。注易經。一伏曼容。南史。伏曼容字公儀。平昌安丘人。爲周易集解。七錄有伏曼容周易注八卷。唐志有周易集林十二卷。一姚規。隋志有姚規周易注七卷。一崔觀。隋志有崔觀周易注十三卷。一盧氏。隋志有盧氏周易注十卷。一何妥。北史。

何安，字棲鳳，西城人。撰周易講疏三卷。隋志作十三卷。一王凱沖。唐志有王凱沖周易注十卷。一侯果。有集說。惟朱仰之及彭城蔡景君無考。一孔穎達。新唐書。孔穎達。字冲遠。冀州衡水人。舊唐書志有孔穎達等周易正義十四卷。新唐志作十六卷。一崔憬。據大衍章注云。崔氏探玄。病諸先達。是刊輔嗣之野文。補康成之逸象。〔疏〕王氏專言名理。流于老莊。故刊輔嗣之野文。鄭氏多尙象數。猶存古義。故補康成之逸象。各列名義。共契

玄宗。先儒有所未詳。然後輒加添削。每至章句。僉例發揮。俾童蒙之流。一覽而悟。達觀之士。得意忘言。當

仁。既不讓於師。論道豈慚於前哲。至于卦爻象象。理涉重玄。經注文。書之不盡。別撰索隱。〔疏〕其書不傳。諸家亦未

錄。錯綜根萌。音義兩存。詳之明矣。其王氏略例。〔疏〕隋書周易略例一卷。此書卷末今亦未刊。得失相參。采葑采菲。無以下體。仍

附經末。式廣未聞。凡成一十八卷。〔疏〕或作一十卷。新唐書作集注周易十七卷。中興書目通考作十卷。以貽同好。冀將來君子無所疑焉。祕書

省著作郎。〔疏〕朱睦㮮曰。鼎祚。資州人。仕唐爲祕閣學士。以經術稱于時。及閱唐列傳及蜀志。俱不見其人。又袁桷清容居士集。有資州李鼎祚讀書齋。臣李鼎祚序。〔疏〕中興書目集解十卷。唐著作郎李鼎祚集三十

餘家。凡十七篇。其所取荀虞之說爲多。中興藝文志。李鼎祚易。宗鄭康成。排王弼。晁公武郡齋讀書志。鼎祚集解取序卦各冠雜卦之首。其序云。刊輔嗣之野文。補康成之逸象。蓋宗鄭學者也。陳振孫直齋書錄解題。隋唐以前。易諸家書。逸不傳者。賴此書。猶見其一。二。而所

取于荀虞者尤多。

## 周易集解纂疏凡例

一、是編舊有毛氏汲古閣本、胡氏祕冊彙函本、盧氏雅雨堂本、魯魚亥豕、互有異同、孫氏岱南閣本、兼采諸家、字畫踳駁尤甚、唯木瀆周氏枕經樓本、據儒先論定、多所改正、較諸本爲完善、今所據以纂疏者、周氏本也、間有未盡善者、悉改訂于各條之下。

一、自宋以來、漢易幾成絕學、卽間有留心象數者、皆自據己見、不必根據儒先、我朝經學昌明、名賢輩出、如惠徵君棟、承其家學、說易尤精、張編修惠言、接踵而興、如驂之靳、大抵皆謹遵漢學、于荀虞諸儒之旨、多所發明、其所徵引、總不外集解一書、故茲編所采、雖廣錄諸家、而于惠張兩先生之說尤多、但參合成文、不能詳箸姓氏、非敢掠美、致郭竊向注之譏、閱者諒之。

一、疏家之體、墨守注義、不敢有所出入、重師承也、然義取其當、不尙苟同、茲編于注義未協經旨者、必詳

加辨正。亦有舊義不詳不確者。或另申一說以備參考。兼引諸家者。但加案字。自據管見者。則加愚案以別之。

一、孔穎達正義。專釋王韓注也。茲編所引王韓注。有全用正義者。則書孔疏以別之。閒引數語者不書。

一、古人說易。各有宗派。易含萬象。不可一例拘也。故李氏兼收並蓄。多兩存其說。茲編亦兩釋之。以備學者採擇。至詮解諸家。亦各遵其例。不相混淆。重家法也。

一、諸家體例。淵源各別。如鄭言爻辰。荀主升降。虞明消息之類。若不詳其端委。讀之每多扞格而難通。茲于諸家說易體例。撮其尤要者。列于簡端。俾讀者開卷瞭然。庶于各家宗旨。得其梗概。由此以讀全書。勢如破竹矣。惟卷中徵引事實之處。一時未及檢出原書。難免舛誤。尙冀博雅君子。匡所未逮。

# 周易集解纂疏諸家說易凡例

## 卦氣

卦氣之說。出于易緯稽覽圖。其書首言甲子卦氣起中孚。六日八十分之七。而從四時卦。其一辰餘而從坎。常以冬至日始。效復生坎。七日消息。及雜卦相去。各如中孚。攷其法。以坎離震兌四正卦爲四時方伯之卦。餘六十卦。分佈十二月。主六日七分。又以自復至坤十二卦爲消息。餘雜卦主公卿侯。風雨寒溫。以爲徵應。蓋卽孟喜京房之學所自出也。漢世大儒言易者多宗之。今列圖于左。俾讀者有所攷焉。



## 消息

剝象傳曰。君子尚消息盈虛。豐象傳曰。天地盈虛。與時消息。故古人稱伏羲作十言之教。謂乾坤震巽坎離艮兌消息。易緯稱聖人因陰陽起消息。立乾坤以統天地。稽覽圖云。唯消息及四時卦當盡其日。又云。消息及離卦相去。各如中孚。太史公亦曰。黃帝考定星曆。建立五行。起消息。皇侃注云。乾者陽生爲息。坤者陰死爲消。消息之義。蓋已古矣。孟氏傳其學。荀氏言之不能具。惟虞氏所注。猶存其概。大抵乾坤十二辟卦爲消息卦之正。其自臨遯否泰大壯觀生者。謂之爻例。自乾坤生者不從爻例。每二卦旁通。則皆消息卦也。消息卦皆在乾坤相合之時。則剝復夬姤泰否之交也。近惟武進張氏言之最精。其詳具所箸周易虞氏消息。



# 爻辰

爻辰者。以乾坤十二爻。左右相錯。當十二辰也。乾鑿度曰。乾陽也。坤陰也。竝如而交錯行。乾貞于十一月。子。左行。陽時六。坤貞于六月。未。右行。陰時六。以順成其歲。歲終從于屯蒙。又云。陰卦與陽爻同位者退一辰。以未爲貞。其爻右行。開時而治六辰。愚案乾鑿度之言。與十二律相生之說合。周禮春官太師。鄭玄注云。黃鍾初九也。下生林鍾之初六。林鍾又上生泰簇之九二。泰簇又下生南呂之六二。南呂又上生姑洗之九三。姑洗又下生應鍾之六三。應鍾又上生蕤賓之九四。蕤賓又上生大呂之六四。大呂又下生夷則之九五。夷則又上生夾鍾之六五。夾鍾又下生無射之上九。無射又上生中呂之上六。周語韋昭注云。十一月黃鍾。乾初九也。十二月大呂。坤六四也。正月泰簇。乾九二也。二月夾鍾。坤六五也。三月姑洗。乾九三